

ORDENANZA MUNICIPAL REGULADORA DA TENZA DE ANIMAIS POTENCIALMENTE PERIGOSOS

(Boletín Oficial da Provincia de Ourense nº 33, 10 de febreiro de 2004)

EXPOSICIÓN DE MOTIVOS

A Lei 50/1999, do 23 de decembro, sobre o réxime xurídico da tenza de animais potencialmente perigosos, ditada ao abeiro do artigo 149.1.29 da Constitución Española, que lle atribúe ao Estado a competencia exclusiva en materia de seguridade pública, asígnalles no artigo 3 aos concellos a competencia para conceder a licenza administrativa que habilite para a tenza de animais potencialmente perigosos.

A Lei 1/1993, do 13 de abril, de protección de animais domésticos e salvaxes en cativeiro imponse, no seu artigo 11, aos concellos a obriga de recollida dos animais abandonados, e o Decreto 153/1998, do 2 de abril, polo que se desenvolve a Lei 1/1993, do 13 de abril, no seu artigo 27, obriga a censar a nivel municipal todos os animais da especie canina, así como outros que regulamentariamente se determinen.

Ao abeiro do artigo 3.2 da Lei 50/1999, do 23 de decembro, a Xunta de Galicia aproba o Decreto 90/2002, do 28 de febreiro, polo que se regula a tenza de animais potencialmente perigosos na Comunidade Autónoma de Galicia e se crean os rexistros galegos de identificación de animais de compañía e potencialmente perigosos e de adestradores caninos.

En consecuencia, de conformidade coas disposicións citadas, e ao abeiro da Lei 7/1985, do 2 de abril, reguladora das bases do réxime local, da Lei 5/1997, do 22 de xuño, de administración local de Galicia e da Lei 39/1998, do 28 de decembro, reguladora das facendas locais, a corporación aprobou esta ordenanza:

CAPÍTULO I.- DISPOSICIÓNS XERAIS

Artigo 1º.- Obxecto

1.-A presente Ordenanza ten por obxecto a regulación da concesión e renovación das licenzas administrativas para a tenza de animais potencialmente perigosos, e a regulación do rexistro municipal de animais potencialmente perigosos.

2.-Quedan excluídos da aplicación da presente Ordenanza os cans e animais pertencentes ás forzas armadas, forzas e corpos de seguridade do estado, corpos da policía das comunidades autónomas, policía local e empresas de seguridade con autorización oficial.

Artigo 2ª.- Definición de animal potencialmente perigoso

1.-Considéranse animais potencialmente perigosos, no ámbito territorial da Comunidade Autónoma de Galicia, todos aqueles que pertencendo á fauna autóctona ou alóctona, independentemente da súa condición, natureza, especie ou raza á que pertencen, e convivindo no contorno humano como

animais domésticos ou de compañía, sexan susceptibles de ocasionaren a morte, ou lesións ás persoas ou a outros animais, ou de produciren danos de certa entidade ás cousas.

2.-No caso concreto dos cans, entenderase por potencialmente perigosos aqueles nos que concorran calquera das condicións seguintes:

- a) Cans que tiveran algún episodio de agresións ás persoas ou ataques de certa entidade a animais ou ás cousas.
- b) Cans que foran adestrados para a garda ou defensa.
- c) Cans que polas súas características raciais puidesen ser aptos para o adestramento e para a garda e a defensa, e en concreto, os pertencentes ás razas seguintes: American Staffordshire Terrier, Pit Bull Terrier, Bullmastif, Dberman, Dogo Arxentino, Dogo de Bordeos, Dogo do Tíbet, Fila Brasileiro, Mastín Napolitano, Presa Canario, Presa Mallorquín (Ca de Bou), Rottweiler, Staffordshire Bull Terrier, Tosa Inu e Akita Inu. Tamén serán considerados neste apartado os cruzamentos en primeira xeración destes, cruzamentos destas razas entre si ou cruzamentos destes con outras razas, obtendo unha tipoloxía similar a algunha das razas anteriormente descritas.
- d) Cans que manifesten unha marcada agresividade natural ou inducida mediante adestramento, malos tratos ou calquera outro medio. A dita agresividade será apreciada pola autoridade competente da Consellaría de Medio Ambiente, de oficio ou logo de notificación ou denuncia, e logo de informe dun adestrador ou veterinario designado para o efecto.

CAPÍTULO II.- DA LICENZA MUNICIPAL.

Artigo 3ª.- Licenza Municipal

1.-A tenza de animais potencialmente perigosos requirirá a obtención, con carácter previo á adquisición do animal, da correspondente licenza municipal, que se estenderá no concello de residencia habitual do propietario.

2.-Nos supostos previstos no apartado 2.a) do artigo 2º, o titular do can disporá do prazo dun mes para solicitar a licenza administrativa, contado dende a resolución ditada para tales efectos.

3.-Nos supostos previstos no apartado 2.d) do artigo 2, o concello comunicarlle os feitos á autoridade competente da Consellaría de Medio Ambiente, xuntando os informes esixidos no dito apartado, debidamente motivados. No caso de que se ditara resolución na que se apreciara a agresividade, o titular disporá do prazo dun mes, a contar dende a súa notificación, para solicitar a licenza administrativa.

Artigo 4ª.- Órgano competente para a concesión da licenza.

Tramitado o expediente conforme co disposto na Lei 30/1992, do 26 de novembro, do réxime xurídico das administracións públicas e do procedemento administrativo común, modificada pola Lei 4/1999, do 13 de xaneiro, concederase a licenza e o número correspondente desta, mediante resolución do órgano que teña atribuída a competencia.

Artigo 5ª.- Requisitos e documentación para obter a licenza municipal.

1.-Para obter a licenza municipal será necesario o cumprimento dos seguintes requisitos:

- a) –Ser maior de idade.
-Acreditarase mediante fotocopia do DNI ou do pasaporte.
- b) –Non ter sido condenado por delitos de homicidio, lesións, torturas, contra a liberdade ou contra a integridade moral, a liberdade sexual e a saúde pública, de asociación con banda armada ou de narcotráfico, así como non estar privado por resolución xudicial do dereito á tenza de animais potencialmente perigosos.
-Acreditarase mediante certificado de antecedentes penais.
- c) –Non ter sido sancionado por infraccións graves ou moi graves con algunha das sancións accesorias das previstas no apartado 3 do artigo 13 da Lei 50/1999, do 23 de decembro, sobre o réxime xurídico da tenza de animais potencialmente perigosos. Non obstante, non será impedimento para a obtención ou, de ser o caso, renovación da licenza, ter sido sancionado coa súa suspensión temporal, sempre que, no momento da solicitude, a sanción de suspensión anteriormente imposta fora cumprida integramente.
-Acreditarase mediante certificado negativo expedido pola Consellaría de Medio Ambiente.
- d) –Dispoñer do certificado de capacidade física e aptitude psicolóxica para a tenza de animais potencialmente perigosos, expedido polo director dun centro médico-psicotécnico debidamente autorizado, conforme se recolle nos artigos 4º, 5º e 6º do RD 287/2002, do 22 de marzo.
- e) –Acreditación de ter formalizado un seguro de responsabilidade civil por danos a terceiros que poida causar o animal, cunha cobertura mínima de 125.000 euros. Este seguro deberá renovarse anualmente.
-Acreditarase mediante a presentación da copia da póliza do seguro claramente detallada ou certificado da compañía aseguradora.

Artigo 6º.- Vixencia e renovación das licenzas.

1.-As licenzas terán unha vixencia de cinco anos. Transcorrido este período deberán ser obxecto de renovación, por períodos de igual duración, mediante a presentación da mesma documentación esixida para á súa obtención e sinalada no artigo anterior, ademais de:

- copia compulsada do certificado médico de sanidade animal efectuado nunha data non anterior a dous meses á da renovación da licenza.
- xustificante do aboamento da taxa municipal.

Artigo 7º.- Acreditación da licenza.

1.-A tenza da licenza municipal acreditarase mediante a entrega dunha copia da resolución do expediente administrativo iniciado a solicitude do interesado, e mediante a entrega dunha tarxeta acreditativa expedida polo concello, onde se fagan constar os seguintes datos:

- Número de licenza municipal.
- Data da resolución do expediente de solicitude da licenza.
- Data de caducidade da vixencia da licenza.
- Nome e apelidos do titular.
- DNI do titular.
- Enderezo do titular.
- Fotografía actualizada do titular.
- Selo do concello.
- Código de identificación do can.
- Raza.

2.-Para a expedición da tarxeta identificativa de cada can requirirase achegar os seguintes datos:

- a) Raza e sexo do animal.
- b) Ano de nacemento.
- c) Domicilio habitual do animal.
- d) Especificación de se está destinado a convivir cos seres humanos ou se, pola contra, ten finalidades distintas como a garda, a protección ou outra que se indica.
- e) Nome do propietario.
- f) Domicilio do propietario.
- g) DNI do propietario.
- h) Nome ou razón social e domicilio do vendedor ou cedor.
- i) Certificado de sanidade animal expedido pola autoridade competente, que acredite con periodicidade anual, a situación sanitaria do animal e a existencia de doenzas ou trastornos que o fagan especialmente perigoso.
- l) Xustificante do aboamento da taxa pola expedición da licenza municipal para a tenza de animais potencialmente perigosos.
- m) Certificado sanitario de esterilización, se se efectuou.
- n) Facturas e xustificante de adquisición.

Os citados datos e, de ser o caso, a documentación oportuna, deberá facilitala o adquirente do animal no prazo de 15 días contados dende a súa tenza efectiva.

3.-O certificado de sanidade animal deberá ser expedido polos servizos sanitarios da Comunidade Autónoma de Galicia ou por un veterinario colexiado.

Artigo 8º.- Renovación

Para a renovación da licenza municipal deberán achegar a seguinte documentación:

- a) Solicitude de renovación.
- b) Copia compulsada da renovación do seguro de responsabilidade civil.
- c) Copia compulsada do certificado médico de sanidade animal, efectuado nunha data non anterior a dous meses á da renovación da licenza.
- d) Xustificante do aboamento da taxa municipal.
- e) Certificado de capacidade física.
- f) Certificado de aptitude psicolóxica.

Artigo 9º. – Revisión e revogación da licenza.

1.-Calquera variación dos datos que figuran na licenza deberá ser comunicada polo seu titular no prazo de 15 días, contados dende a data en que se produza, ao órgano competente do concello ao que corresponda a súa expedición, para que se realice a revisión correspondente.

2.-A perda polo titular de calquera dos requisitos esixidos no artigo 5º, dará lugar a revogación da licenza municipal outorgada, tras a tramitación de expediente contraditorio.

A revogación da licenza dará lugar á perda do dereito á tenza do animal. O propietario, no prazo máximo de quince días, entregará o animal a un novo propietario que posúa a licenza en vigor. De non atoparse un novo propietario no prazo referido, entregarase o animal no centro de recollida de animais vagabundos ou abandonados dependente do concello, respectando en todo momento o disposto na Lei 1/1993, do 13 de abril, e nos artigos 53 ao 60 do Decreto 153/1998, do 2 de abril, que a desenvolve.

CAPÍTULO III.- DO REXISTRO MUNICIPAL.

Artigo 10º.- Rexistro municipal de animais potencialmente perigosos.

1.-Créase o Rexistro municipal de animais potencialmente perigosos, no que se inscribirán os animais potencialmente perigosos que teñan a súa residencia habitual no concello.

2.-O rexistro terá un tratamento informatizado, no que se farán constar, de conformidade co disposto no artigo 4.2 do Decreto 90/2002, do 28 de febreiro, como mínimo, os seguintes datos:

A) Datos do animal:

- Número de microchip.
- Nome do animal.
- Especie.
- Raza (no caso de cans).
- Sexo.
- Características externas (descrición da capa, tipo e cor da pel, etc.).
- Data de nacemento.

- Aptitude (función do animal): compañía, garda, defensa, caza, etc.
- Causa de inclusión no rexistro (sinalar supostos do artigo 2.2 do Decreto 90/2002):
- Enderezo habitual do animal.
- Data de adquisición do animal.
- Forma de adquisición do animal (cría, doazón, traspaso, venda, outras: especificar).
- Especificación de se o animal está destinado a convivir con seres humanos ou se ten unha finalidade distinta como a garda, a defensa ou outra que se indique.

B) Datos do propietario ou posuidor :

- DNI.
- Apelidos.
- Nome.
- Enderezo habitual.
- Teléfonos de contacto.

C) Documentación:

- Licenza administrativa: número de licenza, data de expedición e concello de expedición.
- Nome, enderezo, número de colexiado e número do veterinario colaborador que realiza a marcaxe.
- Data na que se realiza a implantación da identificación e a entrega do documento ao propietario.
- Data de alta no rexistro.
- Certificado sanitario, expedido por un veterinario, que acredite con periodicidade anual a situación sanitaria do animal e a inexistencia de doenzas ou síntomas que o poidan facer potencialmente perigoso, así como una certificación de que o animal carece de lesións ou cicatrices que puideran estar relacionadas coa súa utilización en pelexas ou outras actividades prohibidas.
- Carta sanitaria actualizada cos tratamentos preceptivos e preventivos propios da especie e idade. Na carta sanitaria figurará a catalogación de animal potencialmente perigoso.
- Copia da licenza municipal de tenza de animais potencialmente perigosos, a nome do propietario. Acompañarase dunha copia da póliza que xustifique ter formalizado o seguro de responsabilidade civil.
- Datos do centro de adestramento, se for o caso.
- Incidentes de agresión, se for o caso.
- Unha fotocopia de corpo enteiro do animal.

Artigo 11º.- Identificación.

1.-Os propietarios ou posuidores de animais aos que se refire a presente ordenanza terán a obriga de identificar os animais cun *microchip* nos tres primeiros meses de vida ou nun mes despois da súa adquisición. A identificación efectuarase co sistema e seguindo o procedemento previsto nos artigos 9 e 10 do Decreto 90/2002.

2.-A identificación dos animais da especie canina, coa debida garantía, é obrigatoria sen excepcións.

3.-Os posuidores de animais potencialmente perigosos estarán obrigados a achegarlle a documentación acreditativa da obtención da licenza e a información prevista no artigo 8-3º do Decreto 90/2002 ao veterinario actuante para a súa inscrición no rexistro.

4.-Os propietarios dos animais serán os responsábeis de identificar os animais e de sufragar os gastos que isto ocasione, independentemente do lugar de residencia das ditas persoas. A identificación definitiva suporá un requisito previo e obrigatorio para realizar calquera transacción do animal.

Artigo 12º.- Acceso ao rexistro.

1.-O Rexistro municipal de animais potencialmente perigosos é un rexistro de carácter público, ao que terán acceso as administracións públicas e as autoridades competentes, así como aquelas persoas físicas ou xurídicas que acrediten ter interese lexítimo no coñecemento dos datos que constan nel. En todo caso, o uso e tratamento dos datos contidos no rexistro será conforme co disposto na Lei orgánica 15/1999, de protección de datos persoais.

2.-Para estes efectos considérase, en todo caso, interese lexítimo o que teña calquera persoa física ou xurídica que desexe adquirir un animal destas características, así como aquelas que sufriran calquera tipo de agresión polo animal e desexen exercer as accións correspondentes en calquera vía xurisdiccional, para o que deberán acreditar previamente a interposición da correspondente denuncia.

Artigo 13º.- Inscrición no rexistro.

1.-Os titulares da licenza administrativa están obrigados a efectuar a inscrición do animal no rexistro municipal do concello de residencia habitual do animal, no prazo de 15 días contados a partir da obtención da licenza, tal e como se recolle no artigo 6.2º da Lei 50/1999, do 23 de decembro, e no artigo 4.1º do Decreto 90/2002, do 28 de febreiro.

2.-Tamén será obrigatoria, a instancia do propietario, a inscrición do animal no rexistro municipal do concello correspondente cando se efectúe o seu traslado dun concello a outro por un período superior a tres meses.

3.-Consonte co disposto no artigo 4.3º do Decreto 90/2002, do 28 de febreiro, os datos recollidos no rexistro municipal serán remitidos á Consellaría de Medio Ambiente, no prazo máximo de 15 días, contados dende o momento da inscrición dun animal potencialmente perigoso.

Artigo 14º.- Acreditación da inscrición no Rexistro municipal de animais potencialmente perigosos.

A inscrición no rexistro acreditarase mediante a entrega dunha copia da resolución do expediente administrativo iniciado a solicitude do interesado, e mediante a entrega dunha tarxeta acreditativa, tamaño carné, expedida polo concello, onde se fagan constar os seguintes datos:

- Número do microchip e data da alta do animal no rexistro municipal.
- Nome, especie, raza, sexo, capa e data do nacemento do animal.
- Enderezo do animal.
- Nome e apelidos do propietario.
- Licenza do propietario (número, data de expedición, concello).
- DNI do propietario.

Artigo 15º.- Baixa no Rexistro municipal de animais potencialmente perigosos.

- 1.-A baixa no Rexistro municipal de animais potencialmente perigosos efectuarase a instancia do interesado, logo da acreditación da morte do animal (certificada por un veterinario ou autoridade competente), venda, traspaso ou cesión.
- 2.-Igualmente, procederase á baixa no rexistro no caso de traslado de residencia habitual do animal a un municipio distinto, que así quede acreditado a instancia do interesado. Neste caso o propietario deberá dar de alta o animal no novo concello de residencia.
- 3.-A perda ou subtracción do animal, por un prazo superior a tres meses, considerarase baixa definitiva do animal no rexistro.
- 4.-Farase constar no rexistro como de titularidade municipal aqueles animais depositados no centro de recollida de animais vagabundos ou abandonados dependente do concello, como consecuencia da súa recollida da vía pública, que carezan de dono ou que sendo este identificado non o reclamase no prazo de 10 días do aviso efectuado, consonte co previsto no artigo 53 do Decreto 153/1998, do 2 de abril; así mesmo, constarán como de titularidade municipal os que foran obxecto de comiso definitivo ao propietario.

Artigo 16º.- Comunicación do propietario do animal ao Rexistro municipal de animais potencialmente perigosos.

- 1.-O propietario do animal deberá comunicarlle ao Rexistro calquera variación dos datos que figuran nel, no prazo de 15 días dende que se producise a modificación.
- 2.-Deberáselle comunicar ao Rexistro municipal a venda, o traspaso ou a doazón do animal.
- 3.-Calquera incidente producido polos animais potencialmente perigosos ao longo da súa vida, coñecidos polas autoridades administrativas ou xudiciais, farase constar na folla rexistral de cada animal, tal e como se recolle no artigo 6.4º da Lei 50/1999, do 23 de decembro. No caso de agresións recollerase, como mínimo, a seguinte información: data da denuncia, descrición dos feitos e consecuencias xurídicas.
- 4.-A subtracción ou perda do animal deberá ser comunicada polo titular do animal ao Rexistro municipal, no prazo máximo de 48 horas dende que se teña coñecemento destes feitos, tal e como se recolle no artigo 8.6º do RD 287/2002, do 22 de marzo.

5.-Os propietarios de animais potencialmente perigosos deberanlle comunicar ao rexistro a castración ou esterilización do animal, se esta se producise, remitindo unha copia da certificación veterinaria correspondente que acredite este feito.

CAPÍTULO IV

Artigo 17º.- Circulación e permanencia dun can potencialmente perigoso en vías públicas e locais.

1.-Os propietarios, criadores ou posuidores deberán manter os animais que estean baixo a súa custodia en axeitadas condicións hixiénico-sanitarias e cos coidados e atencións necesarios de acordo coas necesidades fisiolóxicas e características propias da especie ou raza do animal, en cumprimento da Lei 1/1993, do 13 de abril e do Decreto 153/1998, do 2 de abril, en concreto nos seus capítulos IV, VII e X.

2.-A presenza de animais potencialmente perigosos en lugares ou espazos públicos esixirá que a persoa que os conduza e controle leve consigo a licenza municipal e a certificación acreditativa da inscrición do animal no Rexistro municipal de animais potencialmente perigosos.

3.-Os cans potencialmente perigosos, en lugares e espazos públicos, deberán levar obrigatoriamente un bozo apropiado para a tipoloxía racial de cada animal.

4.-Os cans potencialmente perigosos deberán ser conducidos e controlados con cadea ou correa non extensible de menos de 2 metros, sen que poida levarse máis dun destes cans por persoa.

5.-En ningún caso poderá ser conducido por un menor de 16 anos.

6.-Mediante resolución da Alcaldía e en base a razóns de seguranza e orde pública, poderán delimitarse as zonas nas que se prohiba a estancia e circulación dos animais aos que se refire a presente ordenanza.

7.-Todas as instalacións destinadas a albergar animais potencialmente perigosos deberán reunir como mínimo as medidas de seguridade previstas no artigo 12-2º do Decreto 90/2002, de 28 de febreiro.

CAPÍTULO V

Artigo 18º.- Cans potencialmente perigosos abandonados ou vagabundos.

1.-A administración local é responsábel da recollida e mantemento dos animais vagabundos ou abandonados, segundo se recolle no artigo 11.1º da Lei 1/1993, do 13 de abril, no artigo 54º do Decreto 153/1998, do 2 de abril e artigo 17 do Decreto 90/2002, do 28 de febreiro.

2.-Os animais recollidos serán trasladados e mantidos en centros de recollida de animais vagabundos ou abandonados autorizados e rexistrados. As instalacións destinadas a albergaren os cans potencialmente perigosos deberán reunir as medidas de seguridade necesarias para evitar as fuxidas sen produciren danos aos animais. O Concello poderá concertar convenios de colaboración ou cooperación coa consellaría competente nesta materia, con asociacións de protección e defensa dos animais ou con entidades autorizadas para eses fins, para a prestación do servizo enunciado.

3.-Os prazos de estadía previstos serán os que se dan para todos os individuos da especie canina e que veñen reflectidos nos artigos 53, 57 e 58 do Decreto 153/1998, do 2 de abril.

4.-Estes animais poderán ser cedidos en adopción sempre e cando o novo propietario posúa a licenza administrativa correspondente e o can supere as probas de socialización que demostren que o animal non é perigoso para a seguridade das persoas.

CAPÍTULO VI.- INFRACCIÓNS E SANCIÓNS.

Artigo 19º.- Infraccións.

1.-En materia de infraccións e sancións rexerá o disposto na Lei 50/1999, do 23 de decembro, sobre réxime xurídico da tenza de animais potencialmente perigosos e na Lei 1/1993, do 13 de abril, da Comunidade Autónoma de Galicia, de protección de animais domésticos e salvaxes en cativeiro.

2.-As infraccións que se cometan contra o disposto nesta ordenanza clasifícanse como moi graves, graves e leves.

3.-Terán a consideración de infraccións administrativas moi graves as previstas no artigo 13.1º da Lei 50/1999, do 23 de decembro, así como as establecidas no artigo 22º da Lei 1/1993, do 13 de abril, da Comunidade Autónoma de Galicia.

4.-Terán a consideración de infraccións administrativas graves as previstas no artigo 13.2º da Lei 50/1999, do 23 de decembro, así como as establecidas no artigo 21º da Lei 1/1993, do 13 de abril.

5.-Son infraccións administrativas leves as previstas no artigo 13.4º da Lei 50/1999, do 23 de decembro, así como as establecidas no artigo 20º da Lei 1/1993, do 13 de abril, e do que a competencia lle corresponde ao concello, consonte co recollido no artigo 20.3 a) do Decreto 90/2002, do 28 de febreiro.

Artigo 20º.- Sancións.

1.-As infraccións tipificadas no artigo anterior serán sancionadas con multas con contías que serán as fixadas no artigo 13.5º da Lei 50/1999, do 23 de decembro, e no artigo 24º da Lei 1/1993, do 13 de abril.

2.-En todo caso, as infraccións graves e moi graves tipificadas no artigo anterior desta Ordenanza, poderán levar aparelladas como sancións accesorias a confiscación, comiso, esterilización ou

sacrificio dos animais potencialmente perigosos, a clausura do establecemento e a suspensión temporal ou definitiva da licenza de animais potencialmente perigosos ou do certificado de capacitación do adestrador.

Artigo 21º.- Responsábel.

Considéranse responsábeis das infraccións os que por acción ou omisión participaran na súa comisión, o propietario ou posuidor dos animais, ou de ser caso, o titular do establecemento, local ou medio de transporte no que se produzan os feitos e neste último suposto, asemade, o encargado do transporte.

Artigo 22º.- Procedemento sancionador.

O procedemento sancionador aplicábel rexerá polo establecido na Lei 50/1999, do 23 de decembro, a Lei 1/1993, do 13 de abril, así como a Lei 30/1992, do 26 de novembro e as normas que as desenvolven.

Artigo 23º.- Exercicio da potestade sancionadora.

1.-Os órganos competentes para sancionar, de acordo cos artigos 24.2º da Lei 1/1993, do 13 de abril, serán:

- a) Por infraccións leves, o alcalde.
- b) Por infraccións graves, o director xeral de Conservación da Natureza da Consellaría de Medio Ambiente.
- c) Por infraccións moi graves, o conselleiro de Medio Ambiente.

2.-A incoación e tramitación dos expedientes polas infraccións tipificadas como leves correspóndelle ao Concello. Non obstante, o alcalde porá en coñecemento, de xeito que faga fe, do director xeral de Conservación da Natureza da Consellaría de Medio Ambiente, toda acción ou omisión que poida ser tipificábel como infracción grave ou moi grave.

3.-Cando as circunstancias de perigo así o aconsellen, o alcalde poderá proceder á retirada ou custodia dun animal potencialmente perigoso ao cargo do propietario, como medida de carácter provisional durante a tramitación dun expediente sancionador.

DISPOSICIÓN DERRADEIRA

De conformidade co previsto no artigo 70 da Lei 7/1985, do 2 de abril, reguladora das bases do réxime local, a presente ordenanza entrará en vigor logo da súa publicación no BOP e transcorrido o prazo previsto no artigo 65 do mesmo texto legal.

